

АКАФИСТ СВЯТЫМ И БЛАГОВЕРНЫМ КНЯЗЬЯМ И СТРАСТОТЕРПЦАМ БОРИСУ И ГЛЕБУ

Кондак 1

Избранныи и всехвальнии страстотерпцы Христовы Борисе и Глебе, благословеннии чада просветителя нашего равноапостольнаго Владимира, от идольскаго нечестия в чудный свет веры Христовы пришедшии, и кровь пролившии за веру во Христа Бога нашего, похвальная пеня вам приносяще, мы, недостойнии, во гресех и скорбех наших прибегаем к вашему заступлению, вы же яко дерзновение имущии ко Господу, молитесь Его, Всеблагаго Царя Славы, даровати милость почитающим святую вашу память и во умилении сердца поющих вам: Радуйтесь, Борисе и Глебе, великии и славнии страстотерпцы.

Икос 1

Ангельски поживше на земли, венец мученический улучили есте, святая братия по плоти Борисе и Глебе, все упование свое возложивши на Господа, от руки братней, яко овчата незлобивая, заклани бывше, всех себе, своя души и юная телеса Господу предали есте; сего ради, ублажая всечестную вашу память, от всея души нашея воспеваем вам: Радуйтесь, незлобивии агнцы, Господу, яко овча на заклание веденному подражавшии; радуйтесь, кротции голубие, заповедь Христову в кротости сохрании. Радуйтесь, от руки брата по плоти смерть без ропота приявшии; радуйтесь, Авелю ветхозаветному, рукою брата убиенному, уподобившиися. Радуйтесь, венцем небесных славы увенчанныи; радуйтесь, онаго венца небеснаго мученьми достигшии. Радуйтесь, Борисе и Глебе, великии и славнии страстотерпцы.

Кондак 2

Весть о кончине отца своего великаго Владимира слышавши, святой князь Борис много плакашеся, глаголя: “Увы мне, отче мой, свете очию моею, сияние и заре лица моего, увы мне, како зашел еси свет мой, не бывшу мне при твоём скончании, да сам честное твое погребл тело, почто не сподобился лобызати честная седины твоя, отче мой”. Таковым рыданием много тужаше на брези реки Альты, идеже стояще с воинством; во время же сие Святополк, Каину подобный, брат сый, умышляше: погублю братию мою всю и единовластвовать буду. Собра же убийцы, повеле им убить тебе, святой Борисе; ты же сего лукаваго брата своего почитал еси, воздавая честь ему, яко старейшему, и смерть от него прияв, Богу за вся воспевал еси: Аллилуиа.

Икос 2

Разум Божественный испроси нам, святой Борисе, еже подражати, якоже и ты, Господу рекшему: “Не убойтесь убивающих тело, души же не могущих убить”, и в саду Гефсиманском волею в руке мучителей вдавшемся, ты бо, всеблаженне страстотерпче, не сопротив стал еси врагу, сущу брату твоему, и по услышании яко хочет тя убить, стоящу бо ти на Альте реце рекоша киевский бояре: “Гряди в Киев и сяди на престоле отчем, се бо и вои отчии с тобою суть”, ты же рекл еси им: “На старейшаго брата не иду, его же, яко отца имам”. Слышавше убо сия, разыдошася вси, точию ближняя слуги оставшася с тобою, с ними же шел еси ко брату твоему Святополку еже поклонитися яко старейшему князю; сретше же на сем пути твоим вестник некий глаголаше ти о злом умышлении Святополковом: сему такожде не ял веры, введуще себе ни в чесомже согрешивша противу брата твоего. Ведуще убо сия добрая нрава твоего, вкупе с блаженным братом твоим Глебом, вопием вам: Радуйтесь, кротции агнцы противу вепря, брата, ничем же противуоставшии; радуйтесь, чистии сердцем праведницы ничтоже злое о нем помышлявшии. Радуйтесь, велиции исповедницы имене Христова даже до крове ваша; радуйтесь, земнии ангели, чистотою душ ваших небесных чертогов достигшии. Радуйтесь, мира сего мученицы, горних же высот блажени насельницы; радуйтесь, мира дольняго странницы, горняго же блаженства вечнии наследницы. Радуйтесь, Борисе и Глебе, великии и славнии страстотерпцы.

Кондак 3

Силою Вышняго укрепляем, небоязненно приял еси смерть, блаженне Борисе, молитвою и верою в Создателя своего быв укреплен, аще же яко человек и тужил еси, обаче и Сам Господь Иисус Христос в ночь лютых страданий в Гефсимании моляшеся со слезами до пота кровава; своему убо Владыце уподобляяся, и ты печалию одержим быв, но возложивши все упование свое на Господа, в день той же бяхше суббота, вшед в шатер свой молился еси плачем Христу Богу и Пречистой Богоматери, во утрии же недели, певаемей утрени, весть приим яко убийцы твои близ есть ждуще молитвы твоей скончания, прилежне молился еси и егда совершися служба Божественная всего себе предав воле Творца всяческих, Ему же за вся воспел еси: Аллилуиа.

Икос 3

Имуще душу твою устремленную в горня в чаянии смерти ты, святой Борисе, прилежнее убо начен молитися глаголя: “Господи, что ся умножиша стужающии ми, мнози встают на мя”, — и прочее псалма того и паки чтуще псалтырь со многим умилением, глаголаше псалом оный, в нем же суть слова сия: “К тебе привержен есмь от ложесн, от чрева матере моя. Бог мой еси Ты, да не отступиши от мене, яко скорбь близ, яко несть помогай ми; Ты

же Господи, не удали помощь Твою от мене, на заступление мое вонми”, — и прочая псалтыри Давидовы, от нея утешение почерпая и подавая образ терпения во злостраданиях и еже вяшще поучатися в Законе Господни день и ночь. Сего ради тебе и святому брату твоему Глебу во умилении сердца глаголем: Радуйтесь, яко крини сельнии, во утрии дне жития дерзновенно урезаннии; радуйтесь, красотою чистых душ ваших паче оных украшении. Радуйтесь, гроздие винограда Божественнаго, кровь вашу аки вино и жертву Господеви источившии; радуйтесь, древа светлоплодовитая, рая всечестнаго шумом листвий своих Содетеля всех отверзти врата молящая. Радуйтесь, древа, псалмопевцам воспевая, плодами духовными любви и веры Церковь возвеселившая. Радуйтесь, двоице святая, во псалмех воспитанная сладчайшими псаломскими словесы в час смертный укрепленная. Радуйтесь, Борисе и Глебе, великии и славнии страсотерпцы.

Кондак 4

Бурею скорбных помышлений одержим бе святыи Борис по скончании утренняго пения и взирая на икону Христову, с плачем глаголаше: “Господи Иисусе Христе, сим человеческим образом явлейся на земли спасения ради нашего и изволивый на Кресте пригвоздися грехов ради наших, ты и мене сподоби о имени Твоем претерпети страдание сие, еже не от сопротивных, но от брата моего приемлю неповинно, и не постави ему, Господи, в грех сего”. Таковой молитве, великий страдальче Борисе, дивящися, да сподобимся и мы грешнии подражати тебе, якоже ты Господу на Кресте возносимому, глаголавшему: “Отче, отпусти им, не велят бо, что творят”, и первомученику архидиакону Стефану, камением побиваемому бывшу и вопиявшему: “Господи, не постави им греха сего”, и подражая тебе, воспеваем присно песнь хваления за вся Господу: Аллилуиа.

Икос 4

Слышавше сия молитвенная и кроткая о мучителех своих глаголы святого Бориса, жестокосерднии убийцы никакоже умягчишася, но паче исполняхуся злобою и яко зверие лютии внезапу нападоша на тя, святыи страдальче, со оружием, обнаженными мечи и копии и ударив тя прободоша и повергоша на землю. Сие убо воспоминая, содрогаемися, и тебе, и блаженному Глебу похвальная восписуем сия: Радуйтесь, великою любовью пламеневшии даже до крове; радуйтесь, веру до лютаго скончания жития вашего непорочно сохраниши. Радуйтесь, словом и житием своим агнца Христа велегласно проповедавшии; радуйтесь, и сами за Него заклани бывше якоже агнцы. Радуйтесь, от временныя жизни сея преставившиися к жизни нестареемей; радуйтесь, от суетныя скорогибнущия славы преселившиися ко славе вечней. Радуйтесь, Борисе и Глебе, великии и славнии страсотерпцы.

Кондак 5

Чужде убийцем милосердие воистину, егда заклавши тя, святе Борисе, нечестивии, зря тя повержена на земли, абие взяша и обвивше в шатер якоже плащаницею, возложиша на колесницу и везоша с собою и сretoша два варяга посланнии от Святополка и тии приникше видеша еще дышуща, обаче сие подвиже их паче на ярость и извлек един от них меч свой вонзе в сердце твое и тако скончался еси, о великий мучениче, от зверонравных людей люте терзаемый, Господу же Мздовоздаятелю воспевший немолчно: Аллилуиа.

Икос 5

Узре смерть святаго Бориса, верный слуга его Георгий, паде на тело господина своего и сие глаголаше: “Не оставлю тебе, господине мой любимый, но идеже красота тела твоего увядает, тамо и аз скончаю живот мой”. И сия убо любовь слуги никакоже коснуса злых сердец: взявше убо копия прободоша и Георгия якоже и Бориса, таже Иудину нраву поревноваше, прельщени бывше златою гривною на выи Георгиевой, даром Бориса верному рабу своему, иже сняти никакоже бе мощно, отсекоша того ради главу Георгиеву и мнози отроцы Борисовы таможде побиени бывше, сострадальцы господину своему явишася. Сие лютое дело чад сатанинских умными очима нашими созерцаю, благоговейне поем мученицем: Радуйтесь, Борисе и Глебе, святые Русии новии страстотерпцы; радуйтесь, прославлении в лице святых мученик. Радуйтесь, и с собою приведши лик сострадальцев; радуйтесь, увенчанныи нетленною славою мученических венцев в горних обителех. Радуйтесь, земную плачевную юдоль пренебрегшии, зря умными очима славу небеснаго чертога; радуйтесь, онаго чертога достигшии и венец победы от Христа приявшии. Радуйтесь, Борисе и Глебе, великии и славнии страстотерпцы.

Кондак 6

Проповедует мир христианский величие страданий святых мучеников Бориса и Глеба, имея их, яко путеводителей своих к Горним Селениям, глаголет бо святой Симеон Метафраст, писатель деяний святых Божиих, яко: “Жития и подвиги святых подобятся светлости звезд, якоже бо звезды положением на небеси утверждени суть, всю же поднебесную просвещают, тыяжде и от индиан зрятся, не сокрываются и от скифов, землю озаряют и морю светят, плавающим кораблям управляют, ихже имен аще и не вемы, множества ради, обаче светлей доброте их чудимся, сие светлость святых, аще и затворены суть мощи их во гробех, но силы их в поднебесней земными пределами не суть определены”. Чудимся тех житию и удивляемся славе, юже Бог угодившия Ему прославляет, воздвигая и нас хладных ко славословию имени Его пети со умилением: Аллилуиа.

Икос 6

Светом Троическим просвещаемии в горних обителех души мученическая, выну предстоящи Престолу Того, за Него же лютыя муки претерпеша на земли, свыше от оных горних чертогов молитвами своими ниспосылают нам от Творца всяческих мир и благоденствие, аще токмо память их чтим и просим помощи их усердно, не усты токмо, но и паче сердцем, почитая тако и память святых страстотерпцев Бориса и Глеба, во умилении сердечном глаголем: Радуйтесь, доблестнаго лика мученическаго светлое сияние; радуйтесь, всего рода христианскаго славо и украшение. Радуйтесь, добродетелей евангельских честная вместилища; радуйтесь, взыскателие небеснаго вечнаго сокровища. Радуйтесь, венцем вечнаго веселия на Небеси увенчанныи; радуйтесь, и нас сущих на земли помощью своею не оставляющии. Радуйтесь, Борисе и Глебе, великии и славнии страстотерпцы.

Кондак 7

Мира суетнаго сладости ни удержаша вас на земли, мученицы святии Борисе и Глебе, от княжеския славы ко славе вечней прешедше, оную бо вечную святую красоту небес умными очима зрели есте. Ея сладости лютым путем мучения достигосте и тамо во Храме Небесныя дивныя Божия славы, у Престола Вседержителя Бога, воспеваете выну: Аллилуиа.

Икос 7

Егда прободен бе святой Борис и тайно без единыя почести погребен в Вышгороде, Святополк зверонравный помышляше в себе, како и Глеба убити; сей же убо Глеб от единыя со святым Борисом матере сын бе Владимиру, юн сый, нравом кроток, тих и незлобив. Сему убо князю в Муроме, посла Святополк лестно глаголюще: “Отец велми болит и зовет тя к себе, хотяще видети тебе, гряди убо борзяся в малей дружине”. Вняв убо сим глаголам, Глеб святой скоро потщися иде в Киев, не испытую вести сия, любяще бо отца своего и крепким желанием горя облобызати его честныя седины. Мысленне воспоминая сие скорое твое течение ко смерти, тебе и брату твоему Борису умильно зовем: Радуйтесь, лестию уловленныя и к смертному пределу земныя жизни ваша скоро текшия; радуйтесь, лютыми страданьми небеснаго покоя достигшии. Радуйтесь, о телесех своих всячески небрегшии; радуйтесь, души ваша Господеви приобретшии. Радуйтесь, земную плачевную юдоль без сожаления оставльшии; радуйтесь, небесную славу уллучити сподобльшиися. Радуйтесь, Борисе и Глебе, великии и славнии страстотерпцы.

Кондак 8

Странно есть людем христоролюбивым видети, како брат окаянный избившаше братию за почести Великаго на Руси князя и богатство многих градов и областей, но таковы убо мысли людей нечестиваго века сего, и таковы

козни людей, яже не Богу служат, не о Бозе помышляют, но похотем своим и миру погибельному усердно работают, в помрачении ума и сердца своего дерзкия хулы изрыгая на Господа Творца всяческих, мы же благоговейно почитая память мучеников, Богу Благодетелю нашему вопием выну песнь хвалы: Аллилуиа.

Икос 8

Весть прием от сестры своея Предиславы из Киева, брат святых мученик Ярослав, князь Новгорода, вознести святому Глебу о лукавствии Святополка, текущу же скоро в Киев Глебу и пришедшу ему на устье Волги, нощию потчеса под ним конь в рове и вреди ему мало ногу, того ради седе в ладью пльвише до Смоленска и в урочище, Смядень глаголемое, приставшу ему ко берегу достиже тая весть Ярославова: “Не иди в Киев ко Святополку, понеже отец наш уже умре, Святополк же уби Бориса и тебе хошет убити”. Сию весть слышавши, святой Глеб много плакася по отце и убиением брате, мы же внемлюще сему благосердому плачу, от глубины души взываем святым страстотерпцем сице: Радуйтесь, земному отцу послушествоваше и любви Отце Небеснаго сподобистесь; радуйтесь, яко от отца земнаго Небесному Отцу сопричтостесь. Радуйтесь, велию любовь ко отцу своему земному даже до смерти своея неослабно имевшии; радуйтесь, любовию Небесною, аки огнем пламеневшии и ею в чертоги Отца Небеснаго притекшии. Радуйтесь, небеснаго утешения паче земнаго во псалмех Давидовых взыскавшии; радуйтесь, всякую земную радость презревшии. Радуйтесь, Борисе и Глебе, великии и славнии страстотерпцы.

Кондак 9

Вести о убиении брата Бориса пришедшей и сами убийцы от Святополка достигоша тебе, Глебе святой, и нападоша на ладью твою, ты же узрев разбойники тыя, воздев руце своя со слезами молящеса псаломскими словеса, якоже и Борис, сими спасительными словеса Давида Псалмопевца, егоже во святей купели Крещения наречен был еси: “Суди, Господи, обидящия мя, побори борющия мя, приими оружие и щит и востани в помощь мою; изсуни меч и заключи сопротив гонящих мя, рцы души моей: Спасение твое есмь Аз”. Посреде тоя молитвы трапезарь твой, имея вражду на тя, ем тя создади за главу, вонзе нож в гортань, аки агнца непорочна закланием предаде смерти. Да умягчит жестокая сердца наша Господь и наставит посреде сени смертныя воспевати, якоже и тии страстотерпцы, песнь хваления: Аллилуиа.

Икос 9

Витийство всякое суетных мудрецов века сего окаяннаго не постигнет и не разумеет доблественнаго страдания страстотерпец святых Бориса и Глеба, како сии юныя леты победиша страх смертный, како не прилежали миру, но Бога возлюбивше, Ему Единому всех себе предали есть, смерть приявши,

хвалу воспевая Господеви; сего суетнии люди постигнути не могут, и врази Креста Христова сущи, Христа Бога уничижают, хулы глаголют и на святых Его, обаче не ведают Писания, яко Бог поругаем не бывает. Мы же, ублажая житие и кончину страстотерпец святых Бориса и Глеба, усердно им вопием: Радуйтесь, юродивую мудрость мира презревшии и горния мудрости взыскавшии; радуйтесь, в скорбех земных небрегшии и радость небесную обретшии. Радуйтесь, Агнца ради Христа, и сами в подобии агнцев заклание претерпевшии; радуйтесь, от мрака земнаго к Небесному свету устремившиися. Радуйтесь, горняго мира святии наследницы; радуйтесь, дольняго мира, по слову апостола, мудрии странницы. Радуйтесь, Борисе и Глебе, великии и славнии страстотерпцы.

Кондак 10

Спасению душ наших послужиша, мученицы святии, показаша бо нам, яко болезни тела Христа ради душу спасают и очищают от грехов. Темже молим вас, мученицы Христовы Борисе и Глебе, молитесь за ны ко Господу, спасите души наша предстательством своим, правдивая страстотерпца, и истинная Евангелия Христова послушателя, да молитвами вашими управляемии, достигнем Небеснаго Царствия и тако воспоем Господу Победителю смерти и ада: Аллилуиа.

Икос 10

Свет чудес и исцелений возсия от телес ваших, святии страстотерпцы, положенным бывшим мощем вашим в Вышгороде, первее под спудом, таже изнесенным от земли во храм, от брата вашего Ярослава созижденный; по мнозех же летех князь Мономах Владимир, храму каменну созданну бывшу, внесе в онь святая телеса ваша, чудесы сияющая. Сия благоговейне воспоминаемая, умиленно глаголем вам, святии: Радуйтесь, вместилища благодатных дарований Духа Божественнаго, Его же храмы нерукотворенныя телеса ваша суть; радуйтесь, сокровища благодати немощная врачующей, в телесех ваших пребывающей. Радуйтесь, даром благодати сия отроку скорчену имущу ногу, исцеление явлением своим подавшии; радуйтесь, слепцу прозрение даровавшии, и хромому отсечену ногу имущу и принесену бывшу к раце мощей ваших, ногу во едином часе во удивление всех зрящих возрастившии. Радуйтесь, жену некую, не почетшую дне святителя Николая, усущением руки вразумившии и по слезном покаянии у мощей ваших исцелившии; радуйтесь, тому же святителю Николаю поревновавшии, оклеветанных князю Михаилу неправедно мужей от темницы свободившии. Радуйтесь, Борисе и Глебе, великии и славнии страстотерпцы.

Кондак 11

Пения похвальная приносит вам, святии страстотерпцы, земля ваша от дней преставления вашего страдальческаго и до днесь, воздвигает храмы

имени вашему, почитает дни страданий ваших, величается о имени вашем. Переяслав древний град отца вашего Владимира совершая во вся лета в память вашу крестная хождения по берегу реки Альты, на нейже святой Борис заклан бысть, радуется. Радуется и весь Бориспольская, яко весь Борисова нареченная воспоминанием страстей ваших. Сего ради в радости духовней вопием: возсия днесь преславная память ваша, страстотерпцы Христовы Романа и Давиде, созывающии нас к похвалению Христа Бога нашего, тем притекая к вам исцеления дар приемлем, вы же с лики ангельскими предстояще Святей Троице, молитесь спастися нам, поющим во умилении сердца Богу: Аллилуиа.

Икос 11

Страшную казнь прия от правосуднаго Господа новый Каин — Святополк, иже прозвание окаяннаго от потомства ему дадеся, по убиении бо страстотерпцев святых Бориса и Глеба и третияго брата Святослава умертвил есть, абие же по сих Ярослав собра вои, подвижесе ратию на Святополка и победив его на месте убиения Бориса святаго по мнозей молитве сицевой: “Кровь братий моих вопиет от земли к тебе, Владыко, Господи Боже мой, но молю Тя, Всеблагий Творче, Судие Праведный, отмсти кровь праведных сих, якоже кровь Авелеву на Каине, положив на него трясение, тако положи трясение и на сем окаяннем Святополке, яко да не возможет проливати более крове братния и христианския”. И бысть тако по молитве сей: стена и трясыйся, якоже Каин, бежа Святополк чрез всю землю Ляшскую, вопия: “Се женут нас, бежите, бежите”, и в пустынях Ляхии и Чехии сконча живот свой. Ужасом одержимии, зря лютую кончину окаяннаго, вопием вам, мученицы святии: Радуйтесь, незлобиво смерть приявшии, научите смирению и нас, гордостию возносящихся. Радуйтесь, от властолюбия мученнии, свободити ны от духа любоначалия. Радуйтесь, не сопротив ставшии врагу, сущу брату вашему, дадите и нам крепость в несении скорбей; радуйтесь, не противльшиися злему ухищрению, ниспошлите и нам дивный дар терпения. Радуйтесь, крепости Божественной исполненнии, укрепите ны на пути спасения; радуйтесь, от соблазнов суетнаго мира отвергшиися, молитвами вашими нас вечнаго плача исхитите. Радуйтесь, Борисе и Глебе, великии и славнии страстотерпцы.

Кондак 12

Благодатию, данною вам от Бога, во еже помогати скорбящим и озлобленным, помощь даровали есте, святии, князю Александру на реце Неве противу свеев, виде бо вас при захождении солнечном воевода Филипп на реце посреди корабля стоящих и плывущих: “Гребцы же седяху аки мглою одеяни”, и слыша глаголение сие: “Брате Глебе, пойдем скоро да поможем сроднику нашему”, и во утрий день Александр победи враги и короля их уязви

мечем в лице. Такжеже и Димитрию во одоление Мамаю явили есте помощь, воздвизая пети Богу сицевая Благодеющему: Аллилуиа.

Икос 12

Поюще ваша, святии страстотерпцы Борисе и Глебе, страдания, ублажаем ваше дивное непостижимое терпение и почитая святую память вашу, молимся вам: сохраните мирну страну нашу, великим отцем вашим святым Владимиром во Святем Крещении просвещенную, укрепите дух и руце православных, борющихся со мглою неправды, даруйте совершенную победу истины и света над тьмою неверия и безбожия и примите похвальная сия: Радуйтесь, истинная Евангелия послушателя, даруйте и нам оное разумение Евангелия; радуйтесь, Закона Христова богописанныя скрижали, дадите и нам сего Закона разумное ведение. Радуйтесь, целомудрия хранителие от младости, научите и нас воздержанию плоти в веще сем прелюбодейнем и грешнем; радуйтесь, незлобия учителяе, покажите и нам незлобия путь к Царствию Небесному. Радуйтесь, о убиении телесе небрегшии, дадите и нам мужество против убивающих тело, души же немогущих убити; радуйтесь, правую веру до конца сохраниши, обличите тыя, яже от веры отеческия правыя отпадают. Радуйтесь, Борисе и Глебе, великии и славнии страстотерпцы.

Кондак 13

О всехвальнии страстотерпцы Христовы Борисе и Глебе, во святей купели Крещения Романа и Давиде нареченнии, призрите с высоты небесныя на нас грешных, скорбящих и озлобленных, милости Божия и помощи требующих, слышите глас моления нашего, тепле вам возносимый и от всяких зол болезней и бед свободите ны. В час же кончины нашея укрепите слабеющий дух наш, да во исходе нашем от брэннаго сего тела, таможе, у дивнаго Престола Царя Славы, с лики ангельскими воспоем: Аллилуиа.

(Этот кондак читается трижды, затем икос 1 и кондак 1)